

宋史

第四
十冊

新學
新學

PDG

宋史卷一百九十四

兵志第一百四十七

兵八

揀選之制
廩給之制

揀選之制建隆初令諸州召募軍士部送闕下至則軍頭司覆驗等第引對便坐而分隸諸軍焉其自廂軍而升禁兵禁兵而升上軍上軍而升班直者皆臨軒親閱非材勇絕倫不以應募餘皆自下選補咸平五年於環慶等州廂軍馬步軍六千餘人內選材勇者四千五百人付逐砦屯防以代禁兵景德二年宣示殿前侍衛司諸禁軍中老疾者眾蓋久從征戍失於揀練每抽替至京雖量加閱視亦止能去其尤者今多已抽還宜乘此息兵精加選揀雖議者恐其動眾亦當斷在必行昔太祖亦嘗患此遂盡行揀閱當時人情深以爲懼其後果成精兵樞密使王繼英等曰今兵革休

息不乘此時遴選實恐冗兵徒費廩食帝曰然近者契丹請盟夏人納款恐軍旅之情謂國家便謀去兵惜費乃命先於下軍選擇勇力者次補上軍其老疾者俟秋冬慎擇將臣令揀去之三年正月詔遣樞密都承旨韓崇訓等與殿前司侍衛馬步軍司揀閱諸軍兵士供備庫使帶御器械綦政敏等分往京東西路揀閱八月詔效順第一軍赴京揀閱以補虎翼名闕是軍皆河東人帝念其累戍勞苦故升獎焉大中祥符二年四月詔曰江南廣東西路流配人等皆以自抵憲章久從配隸念其遠地每用軫懷屬喬嶽之增封洽溥天之大慶不拘常例特示寬恩江南路宜差內殿崇班段守倫就昇州洪州廣南東西路差殿直閤門祇候彭麟就桂州與本路轉運使同勾抽諸州襍犯配軍揀選移配淮南州軍牢城及本城有少壯堪披帶者卽部送赴闕當議近上軍分安排如不

願量移及赴闕者亦聽若地理遠處卽與轉運使同乘傳就彼依
此揀選五年正月帝諭知樞密院王欽若等在京軍校差充外處
人員軍數不足有妨訓練可詔示殿前侍衛馬步軍司簡補禁軍
逐指揮兵士內捧日上三軍要及三百人龍衛上四軍各二百五
十人拱聖驍騎驍勝宣朔神騎雲武騎各三百五十人竝於下次
軍營升填須及得本額等樣及令軍頭司於諸處招揀到人內選
填營在京者引見分配在外處者準此仍委逐司擘畫開坐以聞
在京差出者候替回揀選九年十一月詔河北河東陝西諸州軍
揀料本城兵五百人以上升爲一指揮於本處置營教閱武藝升
爲禁軍天禧元年二月遣使分往諸州軍揀廂軍驍壯及等者升
隸上軍六月召選天下廂兵遷隸禁軍者凡五千餘人天聖閒嘗
詔樞密院次禁軍選補法凡入上四軍者捧日天武弓以九斗龍

衛神衛弓以七斗天武弩以二石七斗神衛弩以二石三斗爲中
格恩冀員僚直驍捷軍士選中四軍則不復閱試自餘招揀中者
竝引對凡員僚直闕則以選中上軍及龍衛等樣弓射七斗合格
者充仍許如龍衛例選補班直凡選禁軍自奉錢三百已上弓射
一石五斗弩蹠三石五斗等樣及龍衛者竝親閱以隸龍衛神衛
凡騎御馬直闕小底則閱拱聖驍騎少壯善射者充凡弓手內殿
直以下選補殿前指揮使射一石五斗御龍弓箭直選補御龍直
御龍骨朵子東西班帶甲殿侍選補長入祇候御龍諸直將虞候
選補十將射皆一石四斗東西班散直選補內殿直捧日員僚直
天武龍衛神衛親從選補諸班直御龍骨朵子直弓箭直將虞候
選補十將御龍直長行選補將虞候射皆一石三斗員僚龍御騎
御馬直小底選補散直射皆一石二斗凡弩手東西班帶甲殿侍

選補長騎祇候射四石御龍弩直將虞候選補十將射三石八斗
長行選補將虞候射三石五斗其捧日天武龍衛親從選補弩手
班御龍弩直者亦如之其次別爲一等減二斗自餘殿前指揮使
諸班直以歲久若上名出補外職者所試弓弩斗力皆遽減弓自
一石三斗至八斗弩自三石二斗至五斗各有差凡班直經上親
閱隸籍者有司勿復案試其升軍額者或取少壯拳勇或旌邊有
勞至於河清遽補牢城配軍亦閒下詔選補蓋使給役者有時而
進負皁者不終廢也其退老疾則以歲首或出軍回轉員皆揀汰
上軍以三歲河北遇大閱亦如之景祐元年詔選教駿填拱聖諸
軍退其老疾爲贍員不任役者免爲民三年詔選驍騎雲騎驍勝
填拱聖武騎寧朔神騎填驍騎康定元年選御輦官爲禁軍輦官
二十六人遮輔臣諠訴斬其首二人餘黥隸嶺南卒選如初慶曆

三年詔韓琦田況選京師奉錢五百已上禁軍武技精捷者營取五人樞密院籍記姓名以備驅使況因言今天下兵踰百萬視先朝幾三倍自昔養兵之冗未有若是且諸路宣毅廣勇等軍孱弱眾甚大不堪戰小不堪役宜分遣官選不堪戰者降爲廂軍不堪役者釋之上然其言皇祐元年揀河北河東陝西京東西禁廂諸軍退其罷癯爲半分甚者給糧遣還鄉里係化外若以皐隸軍或嘗有戰功者悉以贖員處之三年韓琦奏河北就糧諸軍願就上軍者許因大閱自言若等試中格舊無皐惡卽部送闕量材升補乃詔四路都總管司自今春秋閱委主管選長五尺六寸已上弓一石五斗弩三石五斗者并家屬部送闕嘉祐二年詔神衛水軍等以五年諸司庫務役兵以三年一揀五年選京東西陝西河北河東本城牢城河清裝御馬遞鋪卒長五尺三寸勝帶甲者補禁

軍其嘗犯盜亾坐黥者配外州軍歸遠壯勇八年右正言王陶奏
天下廂軍以歲首揀至於禁軍雖有駐劄還日揀法或不舉臣竊
惟調發禁軍本籍精銳軍出之時尤當揀練請下有司凡調發禁
軍委當職官汰年六十已上將校年六十五已上衰老者如此則
兵精而用省矣下其章殿前馬步軍司奏曰舊制遣戍陝西河北
河東廣南被邊諸軍悉揀汰餘路則無令請自今諸軍調發悉從
揀法詔可又詔凡選本城牢城軍士以補龍猛等軍者竝案籍取
賞給奉錢五百及龍猛等者以配龍猛其不及等與賞給奉錢四
百以下若百姓黥隸及龍騎等者以配龍騎其龍騎軍士戍還卽
選填龍猛自今本城牢城悉三年一揀著爲令治平元年閱親從
官武技得百二十人以補諸班直乃詔自今親從官限年三十五
以下者充又詔如聞三路就糧兵多老疾不勝鎧甲者可勿拘時

揀年五十以上有子弟或異姓親屬等應樣者代之如無聽召外人是歲詔京畿并各路揀龍騎壯勇歸遠本城牢城宣效六軍河清軍營致遠窑務鑄錢監屯田務隸籍三十年勝鎧甲者部送京師填龍猛等軍其自廣南揀中者就填江西荆湖歸遠闕額仍詔每三年以龍猛等軍闕數聞又詔諸路有步射引弓兩石彊弩四石五斗已上者奏遣詣闕二年詔京東教閱補禁軍先是京東教閱本城自初置卽番隸本路巡檢久不選補上聞其軍多勇壯可用者欲示激勵故有是詔治平四年五月揀選拱聖神勇以下勇分以補捧日天武龍神衛闕數元豐三年六月權主管馬步軍司燕達言內外就糧退軍二十一指揮八千餘人以禁軍小疾故揀退及武藝淺弱人配填旣不訓練又免屯戍安居冗食耗蠹軍儲若自今更不增補庶漸銷減候有闕依禁軍選募教習武藝不數

年間退軍可盡變銳士內奉錢七百者減爲五百依五百奉錢軍等杖招揀從之仍詔上四軍退軍改作五百奉錢軍額八月殿前步軍司虎翼十指揮出戍歸營閔其勞苦詔竝升補爲神勇指揮廣西路經略司言雄略澄海指揮闕額請以諸路配送隸牢城卒所犯稍輕及少壯任披帶者選補從之四年四月提舉河北義勇保甲狄諮言舊制諸指揮兵給內有老疾年五十五已上有弟姪子孫及等校者令承替名糧其閒亦有不堪征役者乞年四十已上許令承替詔河北馬步諸軍依此十二月詔諸班直上四軍毋得簡常有辜改配人元祐二年七月詔諸路每歲於八月後解發試武藝人到闕殿前司限次年正月軍頭司限二月以前試驗推恩呈試武藝人同三年閏十二月樞密院言在京諸軍兵額多闕而京東西路就糧禁軍往往溢額詔差官往逐路同長使揀選發

遣以補其數大觀元年四月詔曰東南諸郡軍旅之事久失訓齊民雖浮弱而阻山帶江輕而易搖安必慮危誠不可忽其諸軍事藝生疏精熟不同非獨見將官訓練優劣實亦繫教頭能否樞密院請委逐路提舉訓練官妙選精熟教頭二年一替若能訓練精熟然後推賞從之至若省併之法凡軍各有營營各有額皇祐間馬軍以四百步軍以五百人爲一營承平旣久額存而兵闕馬一營或止數十騎兵一營或不滿一二百而將校猥多賜予廩給十倍士卒遞遷如額不少損帝患之熙寧二年始議併廢陝西馬步軍營三百二十七併爲二百七十馬軍額以三百人步軍以四百人其後凡撥併者馬步軍營五百四十五併爲三百五十五而京師府界諸路及廂軍皆會總畸零各足其常額凡併營先爲繕新其居室給遷徙費軍校員溢則以補它軍闕或隨所併兵入各指

揮依職次高下同領帝嘗謂輔臣曰天下財用朝廷稍加意則所
省不可勝計迺者銷併軍營計減軍校十將以下三千餘人除二
節賜予及僦從廩給外計一歲所省爲錢四十五萬緡米四十萬
石紬絹二十萬匹布三萬端馬橐二百萬庶事若此邦財其可勝
用哉初議併營大臣皆以兵驕已久遽併之必召亂不可帝不聽
獨王安石贊決之時蘇軾言曰近者併軍蒐卒之令猝然輕發甚
於前日矣雖陛下不恤人言持之益堅而勢窮事礙終亦必變它
日雖有良法美政陛下能復自信乎樞密使文彥博曰近多更張
人情洶洶非一安石曰事合更張豈憚此輩紛紛邪帝用安石言
卒併營之自熙寧以至元豐歲有併廢元符二年樞密院言已詔
諸路併廢堡砦減罷兵將鄜延秦鳳路已減併餘路未見施行詔
涇原熙河蘭會環慶河東路速議以聞三年罷都護府安撫使隸

河蘭州以省餽運詔邊帥減額外戍兵建中靖國元年減放秦鳳
路士兵六觀三年詔昨降處分措置東南利害深慮事力未辦應
費不貲其帥府望郡添置禁軍諸縣置弓手並罷其壯城兵士令
帥府置一百人餘望郡置五十人舊多者自依舊沿邊州軍除舊
有外罷增招壯城帥府望郡養馬并步人選充馬軍指揮及支常
平錢收糴封樁斛斗指揮並罷已添置路分鈐轄路分都監許令
任滿江南東西兩浙各其差走馬承受內臣一員帥府添置機宜
文字去處並罷四年詔四輔州各減一將其軍兵仰京畿轉運司
將未足額并未有人崇銳崇威崇捷崇武內併廢四十四指揮已
揀到人隨等杖撥填四輔見闕禁軍仍將逐輔係將不係將軍兵
以住營遠近相度重別分隸排定及八將訓練駐劄去處疾速開
具以聞河北河東崇銳崇威河東十八指揮河北不隸將十三指

揮併廢見管兵令總管司撥填本路禁軍闕額河北路撥不盡人發遣上京分填在京禁軍闕額河東撥不盡人竝於本路禁軍額外收管宣和五年詔兩浙盜賊寧息其越州置捕盜指揮可均填江東淮東三路州軍闕額至神宗之世則又有簡汰退軍之令治平四年詔揀拱聖神勇以下軍補捧日天武龍衛神衛兵闕熙寧元年詔諸路監司察州兵招簡不如法者案之不任禁軍者降廂軍不任廂軍者免爲民二年從陳升之議量減衛兵年四十以上稍不中程者請受呂公弼及龍圖閣直學士陳薦皆言退軍不便三年二月司馬光亦曰竊聞朝廷欲揀在京禁軍四十五以上微有呈切者盡減請給兼其妻子徙置淮南以就糧食若實有此議竊謂非宜何則在京禁軍及其家屬皆生長京師親婣聯布安居樂業衣食縣官爲日固久年四十五未爲衰老微有呈切尙任

征役一旦別無辜負減其請給徙之淮南是橫遭降配也且國家竭天下之財養長征兵士本欲備禦邊陲今淮南非用武之地而多屯禁軍坐費衣食是養無用之兵實諸無用之地又邊陲常無事則已異時或少有警急主兵之臣必爭求益兵京師之兵既少必須使使者四出太加召募廣爲揀選將數倍多於今日所退之兵是棄已教閱經戰之兵而收市井畎畝之人本欲減冗兵而冗更多本欲省大費而費更廣非計之得也臣愚欲願朝廷且依舊法每歲揀禁軍有不任征戰者減充小分小分復不任執役者放令自便在京居止但勿使老病者尙占名籍虛費衣糧人情既安於所習國家又得其力冗兵旣去大費自省此國家安危所繫不敢不言右正言李常亦以爲言從之是年詔陝西就糧禁軍額十萬人方用兵之初其令陝西河東亟募士補其闕四年詔比選諸

路配軍爲陝西彊猛其以爲禁軍給賜視壯勇爲優隸步軍司役
於逐路都監總管司詔廣東福建江西選本路配軍壯勇者合所
募兵萬人以備征戍三月詔廣東路選襍犯配軍丁壯每五百人
爲一指揮屯廣州號新澄海如廣西之法七月手詔揀諸路小分
年四十五以下勝甲者升以爲大分五十已上願爲民者聽舊制
兵至六十一始免猶不卽許至是免爲民者甚眾冗兵猶是大省
十年遣官偕畿內京東西陝西荆湖長吏簡募軍士以補禁軍之
闕元豐元年詔以馬軍選上軍上軍選諸班者竝馬射弓一石力
諸班直槍弩手闕選親從親事官餘竝選捧日龍衛弓箭手二年
雲騎軍闕二千一百以雲捷等軍補之六年騎兵年五十以下教
武技不成而才可以肄習者竝以爲步軍元祐四年詔今後歲揀
禁軍節級筋力未衰者年六十五始減充贖員八年涇原路經略

司奏揀選諸將下賸員年六十以下精力不衰仍充軍以補闕額從之陝西諸路如之紹聖四年樞密院言龍騎係襍犯軍額闕數尙多今欲將禁軍犯徒兵及經斷者歲揀以填闕從之元符元年又言就糧禁軍闕額於廂軍內揀選年四十以下者填從之宣和七年詔京東西淮南兩浙帥司精選諸軍驍銳發赴京畿輔郡兵馬制置使司靖康元年詔軍兵久失教習當汰冗濫精加揀擇然不能精也方兵盛時年五十已上皆汰爲民及銷併之久軍額廢闕則六十已上復收爲兵時政得失因可見矣中興以後兵不素練自軍校轉補之法行而揀選益精大抵有疾患則選有老弱則選藝能不精則選或由中軍揀補外軍或揀外邊精銳以升禁衛考軍防令諸軍招簡等杖天武第一軍五尺有八寸捧日天武第二軍神衛五尺七寸三分龍衛五尺有七寸拱聖神勇勝捷驍捷